



# Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir\_yimyim



tir yimyim

TAPAK 3

Novak Djokovic Paris  
Masters masayatsü

Tejashwi-i tetsür volunteer tem  
nem mapa agütsütsü nangzük



VOL. XXIII ISSUE NO. 16 (ADOK 16) DIMAPUR YANGTEPNÜ (THURSDAY) MONGPUTENI (OCTOBER) 23, 2025 ₹ 5.00

## IAS Induction indang final panel list agientsüla: JCC

**Dimapur, October 22, 2025 (TYO):** Nagaland sorkari tawa IAS induction process nung metokmeperi inyakseмого anungji final panel list agientsüla ta Joint Coordination Committee (JCC) on IAS Induction-i takhangba agütsüogo,

October 20 nü Cabinet Sub-Committee den senden amending sorkar tsüingdang kuli aika agütsüogo ta Media Cell, JCC-i ashi.

July 6, 2020 aser March 10, 2025 anogotem sorkari Vacancy Circulars nung metokmeperi keta alibatem agizük aser iba sülen March 27, 2025 nü cabinet ajanga itemji metongshia liasü. Iba ya March 10 circular meyipa agiba sülen anogo ana aser application deadline sülen anogo ka lir agütsü ta JCC-i ashi.

July 6, 2020 circular nung Non-State Civil Service (Non-SCS) officer ka IAS nung aniochtsü shia liasü. Iba asoshi UPSC mesüra Department of Personnel and Training (DoPT) ajanga ashishitep kecha malioasü. Supreme Court-i Civil Appeal Nos. 4426-4466 of 2023 atema obendang agütsüba den iba ya putepa lir ta sorkari toktep, ta JCC-isa metetdaksü.

Ajisüaka, March 10, 2025 circular meyipa agiba aser April 24, 2025 nü procedural lapses metongshir ta shia sangdongba ajanga Non-NPSC candidate ka final panel nung aden, ta JCC-isa ashi.

Non-NPSC candidate-i

March 10, 2025 circular kübok application agütsü aser iba nung Nagaland Public Service Commission (NPSC) ajanga shimokba ketdangsürtem dang aniochtsü ta shia liasü. Sangdong nung shia aliba kübok metemsü sernung kechiba iba ketdangsür indang application agizük? ta JCC-isa asüingdang.

March 10 circular meyipa agiba sülen April 24 nü re-advertised asütsü saka fresh applications maru aser guidelines tasenba kübok taoba applicants-i forms resubmit masü. Anungji Screening Committee-i application tasen maru sernung kodaser panel list renem. Iba inyakyim ajunga ya "procedurally invalid" lir ta parnokisa metetdaksüogo.

October 7, 2020 nü DoPT Office Memorandum nung sanctioned process mesüra qualified candidates medeni appointment asübaji ozüangi memelar anungji iba ama nisung ka IAS nung aniochtsü makok ta shia lir. State sorkari Non-NPSC officer ka IAS nung aniochtsü atema inyakyim yanglushia inyakogo aser iba ajanga tarutsü nunga kasa irregular appointments asütsü lenmang lapoka yutsür ta JCC-isa metetdaksüogo.

Anungji IAS Panel List agientsüla aser March 10, 2025 Vacancy Circular meyipa bener arutsüla, ta parnokisa takhangba agütsü.

## KMC tanishirtem anema no-confidence motions agienogo

**Kohima, October 22, 2025 (TYO):** Kohima Municipal Council (KMC) Chairperson Neikhozo Suokhrie aser Deputy Chairperson Khrielievi Chusi anema no-confidence motions benokba atema Mongulbarnü senden amending nüngdakba quorum matong.

"KMC nung Chairperson aser Deputy Chairperson anema October 9 nü tezüluba nung no-confidence notices agütsü. Iba ya Nagaland Municipal Act, 2023 nung Section 15 kübok inyak" ta Kohima Deputy Commissioner B. Henok Buchem-i ashi.

Iba Act nung lateta aliba ama KMC nung ex-officio aser nominated members medeni elected members ajak senden amentsü jatep. Ajisüaka, iba senden nung elected members 6 dang aden aser ibaji required quorum matong liasü, ta pai ashi.

"Iba jagi no confidence motion takok mengutet aser mali akümer. Iba senden nung jembiba ajak agiener" ta Kohima DC-isa ashi.

Iba jagi Neikhozo Suokhrie-i Chairperson aser Khrielievi Chusi-i Deputy Chairperson maneni inyaktsü.

Urban Local Bodies nung

councilor tem tsüingda tangatetba meputep adokba ajanga KMC lennir ana anema no-confidence notices agüja liasü.

Iba motion ya NDPP züngsem 7 aser Independent councilor 3-i benoka liasü.

NDPP-i October 18 nü NPF den loktepogo aser Assembly Speaker nem documents agütsüogo saka ibaji KMC nungbo ano meinyak lir ta osang angazüker.

KMC kübok ward 19 nung NDPP councilor 13, National Peoples' Party (NPP) 3 aser Independent 3 lir.

Künaprong Party high command ajanga KMC len anitsü shimtetba lir aser parnok dak dang keta lir" ta Chairperson Suokhrie-i ashi.

"Ni chairperson inyaktsüba ya Party High Command ajanga shimtetba lir aser parnok ni melennüra inyaktsü akok. Kechi atalok ibaji süiadokogo aser tang nungi councilor tem külemi teka amteper state yimtiba nung ward 19 atema inyaktsü" ta paisa ashi.

Chairperson Suokhrie aser Deputy Chairperson Chusi naprongi councilor tem dang tena dak tamang akaba atema pelaba metetdaksü.

## NSCN-IM tanishir Th Muivah-i Naga flag & Constitution nenshir

**Guwahati, October 22, 2025 (Agencies):** Küm 50 shi lir NSCN-IM general secretary Thuingaleng Muivah-i Manipur nung par tasoyim Somdal semdang.

India sorkar den tang tagidak yimjung olemtep nung Naga National Flag aser Constitution agientsü makok ta arishi küm 93 tain Muivah-i tanü ashi.

Tanü pa Somdal-i maodang Ukhrul town nung sentong ka nung aden. Nisung meyrjang aikati pa pelashishia agizüktsü adenshia liasü.

Tanü nisungtemi Bakshi Ground nungi TNL Ground tashi Muivah meina ao. Pa o jembitsüsa masüba agi NSCN-IM tanishir kati pa indang osang zünga

metetdaksü.

Tatembang lemtet agidang Amsterdam Joint Communiqué (2002) aser Framework Agreement (2015) akhümtsübutsüla kechiyong item ya Naga nunger longjemtsü atema tamendakdak lir ta Muivah-i ashi.

"1964 küm nungi yimjung maparen tenzük aser August 1, 1997 nü ceasefire alitsü mulungrepa liasü. Iba ya kati ka akhümtsübutepba aser telatetba kecha melii olemteptsü tangatetba nung liasü" ta Muivah-isa ashi.

"India sorkari Naga national symbols, talisa flag aser constitution magizükba ajanga Framework Agreement ashioktsü. India sorkari Naga maitsü atema tongtipang symbols magizükba

ajanga onok tsüingda nangzüktepba ajemshi" ta paisa metetdaksü.

Naga nunger rongnung telemsa adokdaksütsü inyakba ajanga küm aika olemtepa arur telongjem adoka aliba raksatsütsü akok. India sorkari chichiba lemtet ka aginüra nangzükba ama inyaktsüla ta Muivah-isa ashi.

"Framework Agreement aser Amsterdam Communiqué akhümtsübutepba ajanga dang yimjung maparen tejakleni otettsü" ta paisa shisem.

Muivah-isa Naga nunger dang longjemtsü aser Naga Flag aser Constitution kübok asen maitsü magizüktsü tashi political movement nung shilem agitsü mepishia metetdaksüogo.

## Wokha nung mezüngbuba Banana Festival 2025 amunger

**Dimapur, October 22, 2025 (TYO):** October 22, 2025 nü Public Ground, Wokha nung mezüngbuba Banana Festival 2025 tenzükogo. Iba benjung ya "Banana for Food, Fibre and Future" omen nung ajemdaker amunger.

October 22 nungi 24 tashi amungba benjung ya Nagaland ajungalen agricultural innovation ajungkettsü, aluyimertem tashi itdaksütsü aser market linkages akangshitsü atema lir.

Tanü benjungmung lapokba sentong nung Deputy Chief Minister & Planning & Transformation and National Highway Minister T. R. Zeliang-i alakteta jaoker ka ama shilem agi.

Pa meina Environment, Forest and Climate Change Minister C. L. John; Women Resource Development Minister Salhoutuonuo Kruse aser MLA & Water Resources Advisor Tongpang Ozukum nungertem aru.

Iba sentong nung Deputy Chief Minister & Home & Border Affairs Minister Yanthungo Patton-i chief host aser MLA & Agriculture Advisor Mhathung Yanthan o MLA Y. Mhonbemo Humtsoe nati hosts ama shilem agia liasü.

Iba sentong nung Wokha District Administration aser national research bodies 3 tsüingda Memorandum of Understanding (MoU) ka nung sign sütepa liasü.

National research bodies asemji- ICAR-National Research Centre for Banana, Tamil Nadu , Institute of Bioresource and Sustainable Development (IBSD),

Imphal aser CSIR-North East Institute of Science and Technology, Jorhat lir.

Iba MoU nung technological integration, scientific farming, production enhancement, circular economy promotion, joint research, cultivation of medicinal and aromatic crops, farmer training, sustainable practices, aser improved market linkages nükjindongtem lateta lir.

"Iba benjung ayongertemi mangdang tulu yur ayongzükba atema pelar. Iba benjung ajanga producers den consumers sendakteptsü, yimdaklir rongsenketzüng jenjang ajungtsü, lanurtem nem mapa agütsütsü aser entrepreneurship ajungkettsü" ta Deputy Chief Minister T. R. Zeliang-i ashi.

"Sorkar department temi ibala maparen nung tongti shilem agitsüla. Nenoki Wokha district atema dang masü saka Nagaland ajungalen ibala mapa pusema nungitsüla. State, district aser national institutions tsüingda amalitepa inyakba atema tenüngsang agütsür aser iba tesentaktep ajanga teküpoktiba jenjang tashi lua inyaktettsü aser rongsenketzüng tajungba akümtsü" ta paisa ashi.

"Wokha ya economic hub ka aser Nagaland Gross Domestic Product nung tongti shilem agir ka akümtsü lenmang lir. Reju balala nungi scientist temi district renlochtsü atema tajungtiba nung len anitsü aser research support agütsütsü mepishir" ta TR Zeliang-isa metetdaksü.

"Iba benjung atema organising committee aser partner

institutions dang kanga pelar. Wokha ya 'land of plenty' lir aser iba benjung ajanga yimdaklirtem rongsenketzüng tajungba akmtsü. Iba benjung ajanga sendaktepa alir ajak longjemdaksür" ta Deputy Chief Minister Yanthungo Patton-ia ashi.

Iba sentong nung Wokha Deputy Commissioner Vineet Kumar, IAS-i okila jembidang benjung ayongzüktsü shisatetba aser One District One Product initiative den putepba indang ashi.

Agriculture Production Commissioner, V. Shashank Shekhar, IAS-ia lanurtemi shilem agitsü, aluyimertem arangshitsü aser mungo atema dang masü saka tanga agricultural products atema human development pusemtsü atema research asütsü ayongzük.

Iba benjungmung nung exhibition stalls 100 tema lapoka lir aser item ya villages, blocks, aser departments ajanga lapokba lir.

Tanü sentong nung Yuthi Delights (local brand), Banana Growers Network, Banana Chocolate aser Lotha Dialect Information Brochure lapoka liasü.

Iba sentong agiba sülen Lotha Hoho Ki, Wokha nung National Workshop on Banana Plantation, Production, Value Addition and Marketing agia liasü.

Iba workshop ya "Envisioning 360° Banana Hill Ecosystem - Science, Policy, Market and Finance inAction" omen nung ajemdaker agi aser experts, scientists, policymakers aser sendaktepa alirtemi tebilembatem lemsatetp.

## NSCN-K (YA) lennir ki amakba atema tebilemstsü abener: NPF

**Dimapur, October 22, 2025 (TYO):** October 20, 2025 nü Indo-Myanmar arrtsülen Longwa anasa Indian security forces-i NSCN-K (YA) tongti tanishir ka ki amakba atema süoki ia bilemer ta Naga People's Front (NPF)-i metetdaksüogo.

Myanmar kübok Khammoi

village nung NSCN-K (YA) lennir ki amakdang nisung aika takümsamaba osang angazüker aser iba atema NPF temulung raksar aser tasür kibongtem aser n nübortem den khuret lemsateper ta Press Bureau NPF-i sangdong ka nung ashi.

Arrtsülen tensa raksatsü ana nung dang lir aser linük anatsülen

nübortem sendaktepa lir. Anungji jungjunga asadanger ang ibala mapa inyaktsüla. Bangdak ketdangpurtemi iba tensa süoki ia bilemstsüla aser yimjung, tensa aser meimchir takütem kümzüka ayutsü atema teti bilemstsü ayongzükter ta parnokisa metetdaksü.

## DGC nung State Level Workshop ka ayongzük



**Dimapur, Mongputeni/Oct. 22 (TYO):** Skill Development Committee, Dimapur Government College ajanga IQAC den lungjemer October 22, 2025 nü College Seminar Hall nung "Beauty, Self-Care and Wellness" omen nung ajemdaker State Level Workshop ka ayongzuka liasü.

Iba workshop nung nisung 54 aden, koba tesayur aser kaketshirtem pei sasa pei temang anepalutsü nungdakba indang awareness agütsütsü nükjidadong nung ayongzuka

liasü.

Sentong nung Kilangsungla Pongener, Assistant Professor, Department of Education, Dimapur Government College menden liasü aser pai iba sentong ayongzükba teratet tongmelang agi lemsatep.

Shisalen sayur Hukali Avito Swu, makeup artist, beauty educator & former cabin crew ajanga iba session agia liasü.

Lai lokti pela agizükba sülen volunteers tem makeup, facial, aser waxing sayutsü asoshi jaoka liasü.

Makeup, facial, hairstyling, waxing aser threading ya College-i agütsüba ita ana Beauty Crash Course nung tenüng zülüoka aliba kaketshir temi sayu.

Iba mapang shisalen sayuri skincare aser makeup yimyattem indang rateta ashi. Kasa mapang Gua Sha tool amshia tejak nemshiba yimya sayua liasü.

Iba sentong nung shilem agirtemi temulung nung rata bilembatem asüngdanga sentong kanga junga agia liasü.

## Shamator nung Life Skills training ayongzük

**Dimapur, Mongputeni/Oct. 22 (TYO):** District Administration, Shamator ajanga Ministry of Social Justice & Empowerment aser Yimkhiung Liberü Arihako, Shamator Area den lungjemer October 22, 2025 nü Life Skills training ka ayongzuka liasü.

Iba sentong nung EAC Shamator, Kudazo Swuro ajanga district nung lanur ajunga nem mapa inyak shidaksütsü pa mangdang lemsatep.

Lanur shia dangar dak

memetaloki litettsü aser district socio-economic ainba nung shilem tajung agütsü atema trade mesüra skill ka-kabo angazüka aser meteta alitsüla, ta pai ashi.

Paisa construction sector nung employment peria lir, anungji district telungzük aser state tesem ajunga nung mapang angutsü maongka ulushitsü asoshi training agitsüla, ta ayongzük.

Iba training sentong nung molok atakba aser ang ainba yimyattem nung rangloka sobaliba tsütsü tongtipang shilem

amshiba den takum alitsü asoshi lenmang sayua liasü.

Iba sentong nung lanur aser tejangrar nisung 70 shilem agia liasü. Training tajungba nung agütsütsü mechi trainee coordinator ka aser takotet nisung pezü iba sentong nung jaoka parnoki yimya balala sayua liasü.

Iba sülen sensaksemba mapang agi, kong shilem agirtemi iba sentong ayongzük dang pelaba lemsatepa sentong tembang.

## State Election Commission ajanga metetdaksür

**Dimapur, Mongputeni/Oct. 22 (TYO):** Pfutsero Town Council kübok Ward-11 (Zhipa) nung October 28, 2025 nü ULB poll agitsü aliba dak sendakba nung Presiding Officer ajanga elector jangjatsü asoshi inyakyim balala indang State Election Commission ajanga Nagaland Municipal Election Rules, 2023 nungi meteta alitsütem lemsatepa liasü.

Identification atema electors temi Indian Passport, Driving License, Aadhaar Card, State/Central Government, Public Sector Undertaking, Public Limited Companies ajanga agütsüba Service Identity Card,

Bank/Post Office PassBook with photograph, Pan Card, Pension Document with photograph mesüra Deputy Commissioner/Additional Deputy Commissioner ajanga agütsüba Indigenous Inhabitant Certificate mashi ka bener arutsü akok.

Item document kibong nung tekolakba atema dang lira, tanüngba kibong nung züngsemtem jangjatsü atema kasaji amshitsü akok.

Iba mesük kibong nung züngsem mashi ka indang document amshia kasa kibong nungi züngsem dangatem jangjaba nunga amshitetsü,

saka züngsem danga temi item documents nung ajemdaker jangjatsüla.

Electoral roll nung elector tenüng, tebu/tetsü/kinungbo tenüng, tetsür/tebur, arishi küm mesüra address tera meputepi alibabo yutsütsü aser electoral roll nung aliba ama elector indang maitüsü jangjatetra aser Presiding Officer mesüra Polling Officer-i temulung süa agizükra pei vote agütsüdaksütsü.

State Election Commission ajanga ashiba documents tekalen agüja alibattem mesayuteter shinga nema vote magütsüdaksütsü, ta sangdong ajanga ashi.



Phom Language Promotion and Translation Cell, Yingli College ajanga October 22, 2025 nü Phom Folk Song and Recitation Competition ayongzuka liasü. Iba sentong ya Phom oshi aser English oshi nung agia Phom oshi indang shisatsü aser puti otsü jembi. Phom oshi temaba jenjangi ajungkettsü aser sobaliba wazüka ayutsü nükjidadong nung iba sentong ya ayonga liasü.

## Mokokchung Police-i Mini-Marathon 2025 ayongzüktsü

**Dimapur, Mongputeni/Oct. 22 (TYO):** Mokokchung Police-i October 25, 2025 nü "Run for Cyber Security Awareness" omen nung ajemdaker Mini-Marathon Race ayongzüktsü.

Kaketshir aser nüburtem nem cyber security, online safety aser cybercrimes nungi jenbua alitsü mera indang awareness agütsütsü nükjidadong nung iba sentong ya ayonger.

Iba Mini-Marathon ya anepdang 5:00 ako nung Police New Reserve nungi tenzüktsü aser Police Point, Mokokchung & Town nung tembangtsü. Cyber

risks aser digital vigilance indang awareness agütsüba nung aroki shilem agitsü mechi nübur ajunga iba sentong nung shilem agitsü ayongzük, ta Mokokchung Police sangdong ka ajanga ashi.

Iba asemtepba sentong tatemi tsünglanglen agüja aliba categories nung takok angur nem senpet aser kulizüng kaket agütsütsü:

(i) Open Category: Tebur aser tetsür (First, Second & Third prizes).

(ii) School Category: Tebur aser tetsür (First, Second & Third prizes).

## FAC aser MCTE tsüngta MoU ka zülutepogo



**Dimapur, Mongputeni/Oct. 22 (TYO):** Fazl Ali College, Mokokchung aser Mokokchung College of Teacher Education (MCTE) tsüngta Memorandum of Understanding (MoU) ka October 22, 2025 nü Fazl Ali College nung zülutepa liasü.

Iba MoU nung Fazl Ali College indang Principal, Dr. I. Wati Imchen aser MCTE indang Principal, Dr. T. Alemla Longkumer nati meyongnem agüja liasü.

National Education Policy (NEP) 2020 curriculum mapa kuma amshiba nung reju ana tsüngta tesendaktep alitsü aser tesayuba, research aser resources lemsatepba nung kasa ajangzüktsü sentongtem külemi inyaksü nükjidadong nung iba MoU ya zülutepa liasü.

Reju anaprongi tapet academic themes nung seminar, workshops aser conferences külemi

ayongzüktsü mulungtepa liasü. Maneni colleges anaprong kübok department balalai teaching, research asr capacity-building inyakyim atema tesayur aser kaketshirtem exchange sentong külemi ayongzüktsü.

Iba MoU zülutepba ajanga academic tsütsü amalitep akatsü aser reju aintsü atema tongtipang mera ka agir alitsü.

Dr. I. Wati Imchen-i iba MoU ya alizüng tajung ka tongtetba lir aser MCTE ya Fazl Ali College indang tenulatsü amai lir ta ashi.


Iba mera tasen tenzükba ajanga reju anaprong aintsü aser ajangzüktsü imlar, ta paisa ashi.

Dr. T. Alemla Longkumer-ia MCTE tenzükba nung Fazl Ali College yagi tongti shilem agia lir, ta ashi aser academic aser terenlok maparen balala nung külemi lungjemer inyaksü ya maongka tulu lir, ta shia liasü.

## Merapani nungi ak bener arubanokdangalibaagentsür

**Dimapur, Mongputeni/Oct. 22 (TYO):** Merapani nungi ak, ak chanu aser ak shi bener aruba, aoba aser tepsetba nokdanga aliba agentsür, ta Additional Deputy Commissioner, Bhandari, Longasen Lotha, NCS ajanga October 16, 2025 nü sangdong ka agütsü.

Nüburtem kumzuka alitsü mechi iba tenokdangba ya August 2025 nung benok, saka Dr. Kikali G. Sumi, Veterinary Assistant Surgeon, Quarantine Check post, Merapani ajanga shisa agütsüba nung ajemdaker nokdanga aliba agentsür, ta sangdong ajanga ashi.



Bihar nung Assembly election atongtsü lia Congress lenir Ashok Gehlot aser RJD tekolakba Lalu Prasad Yadav na ajurutepba noksa nung angur.

## Tejashwi-i tetsür volunteer tem nem mapa agütsütsü nangzük

**New Delhi, Mongputeni/ October 22 (Agencies):** Rashtriya Janata Dal (RJD) lenir Tejashwi Yadav-i Bodhbarnü, Bihar indang flagship Jeevika self-help groups kübok community mobiliser tem nem permanent sorkar mapa aser contract nung aliba employee 150,000 dak tema regularize sütsütsü nangzükogo.

Pai iba tetangzükba ya otsüsütsü ka ta shia, Bihar Rural Livelihoods Promotion Society (Jeevika) kübok yimtsüng nung tetsür volunteer tem aser contract nung aliba mapa inyaktertem parnok mulungka nung amshiba atema National Democratic Alliance (NDA) sorkar aitsüogo. Yadav-i ashiba agi, yimtsüng nung social welfare scheme tem benoka inyakba nung parnoki tongtimbang shilem agiaka parnok nem tangutsü tim magütsür.

"Onoki sorkar kümtetba sülen anogo 20 tsüngda ordinance agizütsü aser ita 20 nung iba mapa asangsang kümdaktsütsü," ta Yadav-i

Bihar nung election agitsü lia iba tenangzükba agütsü.

Pai ashiba agi, RJD-i aniba alliance ya lanur aser tetsürtem nem mapa agütsütsü atema bendanga agütsür lir. Yadav-isa, pa deputy chief minister (2015-2017) asüba mapang "Niyojit Shikshak" (contractual teachers) 450,000 dak tema regularize sütsüba indang jembiba. Pai ashiba agi, BJP lenir Sushil Kumar Modi-i contract nung alirtem regular kümtsütsüba ya shitakba benoka inyaktsü asoshibo tamakoktsü ta tabilemer.

Paisa, Bihar kübok tesem balala nung Jeevika volunteer tem den sensaksemba indang lemsatop aser NDA sorkari parnok atema bilema maliba atema sasa bilemba lemsatop. "Item adianutsürtem yagi küm aika parnok mapa permanent kümtsütsü khanga arudar. Parnoki merekmeju nungi shir nutrition sentongtem amala rural welfare inyakyim tongtimbang ajak benoka inyakdar, ajisüaka sorkari parnok takhangba ya mangashi

ama toktsür," ta pai ashi.

Yadav-i, Jeevika community mobiliser tem nem itashia itasen 30,000 agütsütsü, parnok loan tem tai atoktsü, küm ana atema tetemlok makai sen aputsütsü aser inter-departmental mapa atema incentive ita shia sen 2000 aser sen lakh 5 alang life insurance coverage agütsütsü nangzükogo. Maneni pai, bookkeepers aser cluster coordinator amala tongtimbang Jeevika functionary tem indang honorariums-a ajungkettsütsü ta shiogo.

Yadav-isa, sorkar aser private agency tem ajanga shimba contract nung mapa inyaktertem asoshi kasa tenangzükba agütsüogo. "Tang state-i GST shilem 18 agütsür, saka mapang inyaktertem itasen tesadang dena mangur. Tanungba ya agency commission aser saru nung samatoker," ta Yadav-i ashi.

Paisa, pei ajangzüktsü atema ad-hoc inyakyim benokba atema ketdangsür aser minister kar aitsüogo.

## India-i Kabul nung embassy amenokshiogo

**New Delhi, Mongputeni/ October 22 (Agencies):** Afghan foreign minister Amir Khan Muttaqi-i tawa India semdangba mapang Kabul nung India indang technical mission ya embassy jenjangi ajungkettsü ta sangdongba ama India-i Mongolbarnü Kabul nung embassy amenokshiogo.

Linük ana tsüngda nangzüktepba nung India-i, Kabul nung mission tekolakba ya chargé d'affaires ama designate sütsütsü aser tatsüka lir ambassador ka shimtsü. Taliban-ia taküm November ita tashi nungbo New Delhi-i diplomats ana yoktsü imlar.

India-i Islamic Emirate of Afghanistan (IEA) ya formally agizüka meliaka Afghan nunger diplomat tem ya Afghan embassy nungi inyaksangshitsü. Diplomatic tesendaktep jenjang ajungketshiba ajanga linük ana tsüngda rongsenketzüng nung tesendaktep atsülangshitsü

asoshi lenmang lapoktsütsü aser iba ajang India-i Afghanistan nem teyari tajungba agütsütettsü.

Pakistan aser Afghanistan na rara tialong nung Muttaqi-i India semdanga diplomatic tesendaktep jenjang ajungketshitsü asoshi telemtetba agia liasü.

"Afghan Foreign Minister-i India semdangba mapang telemtetba agiba sangdongba dak ajemdaker sorkari Kabul nung India indang Technical Mission ya Afghanistan nung embassy jenjangi ajungketogo," ta India sorkar sangdong ka ajanga metetdaktsüba den, iba telemtetba agiba ajanga linük ana arok tejangraba dak sendakba nung Afghanistan den tesendaktep akangshitsü asoshi India bendanga agütsür aliba sayur, ta shisem.

2021 kümAugust ita Taliban-i Afghanistan sorkar atsüngtokba sülen India-i Kabul

nung embassy shibanga liasü. Ajisüaka Kabul-i tenangzükba agütsüba sülen India-i 2022 küm June ita nungi technical mission ka lapoker inyaksangshia aruogo, koba tongtimbangsa India-i Afghanistan nem humanitarian teyari agütsüba lemshiba achaayangtsü asoshi liasü.

Muttaqi-i India semdangba ya Taliban-i linük ana tsüngda tesendaktep nung tapak tasen ka lapokba ama agizüker. Iba telongjem ajanga Pakistan nungi kiralongrartem inyaksangshi aitsüogo. Taliban-i J&K ya India meyong ta ashiba ajanga Pakistan jashidaktsü aser Islamabad-i Kabul nem tashishiba ka agüja liasü.

Iba hopta tetenzüklen Pakistan-i, Afghanistan aser Pakistan na mangatetep adokba nung India densema lir ta ashiba ya tamendakdak maka aser kecha dena sendakteptsü makoker ta Taliban-i ashi.

## Rajasthan nung police amakba atema nisung 27 apu

**Bharatpur, Mongputeni/ October 22 (Agencies):** Rajasthan kübok Bharatpur district nung police personnel tem maka gari raksatsüba sülen nisung 27 apu aser minor ana sota yuogo, ta police-i metetdaktsü.

Police ketdangsürtemi ashiba agi, ali mechi Seupura yimtsüng nung telok ana tsüngda mangatetep adokba nungi iba mepetmesü ya tenzüka liasü.

Hombarnü nisung 200 shi-i Bayana jila anasa Bharatpur-Karauli state highway nokdanga yua gari kilometre ana shi bangdaka toktsüba sülen tensa tamajungba küma liasü.

Lokti senshidaktsütsü atema police tem iba tesemi ao saka longkak aitertemi police den teka amteper inyaktsü memulungi long agi aon tenzüka police ketdangsürtem yirutsü aser gari ana raksaja liasü.

"Yimtsüng nung ali mechi

mangatetep adokba sülen nisung 200 shi Bayana jila kübok Bhim Nagar Tiraha tesem nung adenshi. Parnoki state highway nokdanga ayu aser ketdangsürtemi ken o angatettepa jembitsü merangba mapang parnoki police personnel tem amakba den gari raksaja liasü," ta Bharatpur superintendent of police (SP) Digant Anand-i ashi.

Iba tatalokba sülen police-i iba mepetmesü nung densema alir nisung 27 bushiteta apu aser minor-a ana sota ayu. Iba tatalokba dak sendakba nung tetsüra ana pua liasü.

"Aija alirtem police-i okdaki anirogo aser parnok November 4 nü tashi judicial custody nung ayutsü obendang agütsüogo. Parnok ya Prevention of Damage to Public Property Act aser Bharatiya Nyaya Sanhita (BNS) kübok aija puogo," ta Anand-isa shisem.

## Trump, Modi na phone ajanga shishilemba indang jembiba

**New Delhi, Mongputeni/ October 22 (Agencies):** US Tir Donald Trump aser Ato Kilonser Narendra Modi na Mongolbarnü phone ajanga jembiba mapang linük ana tsüngda shishilemba dak sendakba nung ken o tem sensaksemogo.

US-i India indang osettem nung tariff tali meshiba ajanga küm metsü tsüngda linük ana tsüngda tesendaktep tang tamajungba kümer aliba yanglushitsü merangba mapang lenir ana phone ajanga sensaksemogo.

Modi-i Bodhbarnü social media post ka ajanga Diwali benjung salem lemsatepba atema Trump nem tenüngsang agütsü aser ashiba agi, linük anaprongla kiralongrar anema raratsü longjemir lir.

Trump-i White House nung osangbenertem dang ashiba agi, lenir ana shishilembaba dak sendakba nung sensaksemogo. Paisa, taoba mapang ashiba ama India-i Russia nungi totzü aikbo malitsü ta shiogo.

"Tir Trump nai phone call asüba aser Diwali salem lemsatepba atema pelar. Iba tesangwa benjung amungba mapang asen linük ana yagi timla agi alima sangwadaktsüti aser kiralongrar anema longjemir nokdakti," ta Modi-i social media ajanga ashi.

India sorkar sangdong ka ajanga ashiba agi, Modi-i India-United States tesendaktep mapang talangka tashi ita aruba indang lemsatop aser kiralongrar anema raratsü asoshi New

Delhi bendanga agütsür aliba nenshia metetdaktsüogo.

September 16 nü Modi aser Trump na phone ajanga jembiba aser PM o US ambassador-designate Sergio Gor na October 11 nü New Delhi nung ajurutepba sensak asema sülen tang agi tasembenbuba Modi aser Trump na phone ajanga sensaksemogo.

White House nung Diwali benjung amungdang osangbenertem den sensaksemba mapang Trump-i, pa Modi den kanga junga sensaksemogo ta ashi. Iba sentong nung Indian ambassador Vinay Kwatra-a dena liasü.

"Küna shishilemba aser tanga ken o aika indang sensaksemogo, saka talisa shishilemba indang sensaksema liasü. Küna Pakistan den merarateptsü atema-a taoba mapang jembibogo," ta Trump-i ashi.

Trump-isa, India aser US na tesendaktep kanga junga lir aser linük ana ya tenangzüktepba kar yanglutsü asoshi inyaktepdar ta ashi. Paisa, India-i Russia nunger totzü tajemba alidar ta shia arudar.

"Ni Ato Kilonser Modi den jembibogo.. küna tesendaktep junga lir aser pai Russia nungi totzü aikabo malitsü. Ni ama paia rara tembangdaksüner," ta Trump-i ashi. "Pai Russia-Ukraine rara anendaktsüner aser parnoki totzü aikabo malitsü. Parnoki totzü tajemba ali tenzükogo aser maneni tajemba kümdaktsütsü," ta paisa ashi.



## TIR YIMYIM YIMOBILEM (EDITORIAL)

DIMAPUR THURSDAY, OCTOBER (MONGPUTENI) 23, 2025

### SSC tatidang nung takok

**K**üm ana jakdang Manipur nung Meiti aser Kuki nunger na tsüngda azü tokshi lendong tulu atalokba ajanga Manipur lisopur Meite nunger alidak Imphal lenden nung alir Kuki nunger pei ki toktsür ajentsüsa aküm aser Manipur nungsa süaka Kuki nunger alidak Churachandpur district kübok tesem balala nung khen jenoka alitsü asoshi mesemtetsüba tesem "Relief Camps" nung tang tashi kibong aika lidagi. Aji oda, talitsü yangluba pei kidang masü, relief camp nung kibong aika septepa alir asünungji, tebang agi meshitetba timtem aika lir. Ano, talisa yangji alir tanurtem aika school-i mao anenogo aser mapa bushir aika tatidanga magütsütetba timtem nung lir. Ajisüaka, iba ama timtemba mapang ka nung, Staff Selection Commission ajanga Central Police Organisation nung Sub-Inspector mapa angutsüsa Kuki nunger lanur 62-i tatidang nung takok angubaji takoksa rongnunga takok tuluka lir. Iba takok yabo parnok asoshi dang masü saka asenok asoshia tepelatsü aser tayongzüka tulu agütsür. Atangji, Kuki nungertem yabo tangji dang masü saka akhidang nungi central mapa nung kanga temulung agüja tatidang agütsür aser aikati takok angur. Ibayongji, Kuki nungerbo central government office ajak nung lir. Parnoki mapa tulu dang arishia mekazür, anungji IAS, IPS aser IFS ama jenjang aketba mapa menguaka, itemji dang ataa melii, parnok central government nung mapa adoka sangdongba osang angaa atar aser mapa tilateri adokba ajak nung tatidang agütsür aser adoker, anungji küm ishika sülenbo mapa tilakati aiba to tular jenjang tonger alir. Aji oda, central mapa nung sepai nunga aser civil service nunga Kuki nunger maliba Ministry aser dapartment aikabo malitsü südi. Asenokbo parnok amaji masü saka asenok aikati center government ajanga metetdaksüba mapatemji UPSC tatidang ajanga anguba IAS, IPS ser IFS ama mapa tulutem ya danga ta bilemer, anungji asenoki tang amaji sepai mapatem adokdang mesüra office assistants mapatem asoshi tatidang agütsütsü ajadang, tenüng magütsür, saka state nungbo peon, chowkidar mapa atema nüngsena aika agia bushiteper. Iba jagi government mapa inyaknürtem aika mapa mangu amajok nung mapang endoka kazüba angur. Aji oda, asenoki bilemdangra, Nagaland government kübokbo küm nung mapa aikabo madoktsü, anungji mapa ka atema nisung noklang kati rakteptsü, iba jagi asen lima nung mapa manguba tebilemtsü agi kangshir. Atangji, shitakbabo asen lima nung mapa maka masü saka asenok teimbakati government mapa dang inyaknüba agi mapabo inyaker meinyakma lir ser nung mapa mangu kangshiteper. Aji oda, tatsüba agi, India len oagi inyaksüabajibo toktsür Dimapur Railway station nunga Naga nungerbo Railway nung inyaker kata mangutsü, kechiyong asenoki mebushir. Joko, Manipur nung Kuki nunger amaji Nagaland nunga asenok Aortemi central government mapai aiba lenmang ya sadema lapoktettsüla aser SSC ajanga central office nung kechi mapa atemasa merangdangtsü osang arudir, temsü dang lirabangla nisung ajaki merangdangtsüla. Atangji, tatidang takok ngua agütsütsü asoshi yimya meteta tesem kar nungbo kar nem 'coaching; agidaktsütsü nüngdaktsü. Itemji asenok lokti tentetemi anepalutsüla. Ano, asenok tia ajung tanü asüngbo Aor Officers' Telungjema Kohima, Dimapur aser Mokokchung nung tenteta angur, anungji item lenirtem jagi NPSC aser UPSC ajanga agiba tatidangtem nung dang masü saka SSC ajanga agiba tatidangtem indanga asen lanur mapa bushirtem nem metetdakja yaritep nungbo, asenoka Kuki nunger amaji, küm shia central government mapa nung nisung ter metsübo itettsü. Joko, asenok Naga nungertem ya Nagaland government mapa agi matar, anungji asenok samanir kinbo Nagaland alema oagi shisatsüa aser mapaa bushitsü nüngdaka kümogo. Akhidang, Nagaland nung Naga nunger tazünger malidangbo office ajak nung tular nungi shir clerk aser typist tashi tsümartem dang liasü saka tanübo parnokji teimbaka asenoki melentetogo, kechiyong asenokji tangar dang nungi tama zünga-shia meteteritem lir. Ajisüaka tangari asenok dak tenük kanga yoker, anungji itemji mangu ama toktsür, asenokbo India nung tesem ajaklen central office nung mapa inyaker kaka ananabosa alitsüsa SSC ajanga agiba tatidangtem kata mezüdoki agütsütsü lanur govt. mapa bushirtem rongnung ajungshiteptsü junger.

## OLEMSABANG

### LOKTI LENNIR AJAKI LOKTIJI AROK MEYONG TA ANGATETA ANITSÜLA

~ L. Kika Pongener

(Yashi adok nungi...)

Alima nung ya asen kija alir masü; nubur den alir; lokti nung lennirtemjia pei sasa lennir ataba masü; nuburi shimtetba lennir ta angatetsüla. Lokti nung lennir shiba/shirnok sudir suaka, nubur taginuba angateta/meteta loktiji anitsü merangtsüla. Lennir shibai/shirnoki nubur hau ta mali; pei mulungba aser pei tangatetba kisung nung lokti inyakyimji attsür aotsü meranger; item lennir dangji lennir tajung ta majatsü. Koba putu nung; koba telok nung; ibala mesukba lennirtem lishia/ata-a atongoka lidir.....Iba putu aser iba nuburji kangasa tia maka asütsü. Lennir tajungi külem tenzüker nungi shisatsü agir; nubur ola angar; nubur taginuba metetsü meranger; aser nubur taginuba nung ajemdaker ken o ajak lemteter.

Ano lokti nung lennir ajaki kechi mapa inyakdir inyaka-aka, pei nuja jurila atema masü, saka lokti atema inyaker asünungji, nubur atema tapet asütsü masütsü (?) nubur ajaki mulonga agizüktettsü asü magizüktettsü (?) ta nubur nungi shisatsü agia inyaksü kanga tongtipang lir. Kechi mapa sudir suaka, lokti atema inyaka mapa ka nung; nuburi temulong masütsüsa sura; khen kanga junga shisadanger melenshia yanglushitsüla. Kechi ken o telemtetba agidir agiaka, nuburi magizüktetra; tashiyim agi attsür aotsü memerangi khen meyipa reprangshitsüla. Ano temalen shisemba ama, tanu asenok ya tashitemeteter aika aliba putu ka nung alir asünung; lokti nung lennir aser nutsüng shiaji pei pei yari temetetba aser tangatetba tilakabosa amma lir. Anungji lennir ajaki nutsüngtemji kanga yanua (Under estimate) mebilemtsüla. Lennir shinga-ia pei bilemba aser pei i angatetba kisung nung lokti kaji anir aotsü memerangtsüla. Ano lokti ajungtsü asoshi mapa tajung ka inyakdang, mesura ken o kar telemtetba agiba nung; iba mapa jagi aser ken o telemtetba agiba jagi nubur tsüngda nung mepetmesu-ang adoktsüsa sura, mesura ken o bulutsüsa sura; khen kanga junga shisadanga bilemdangtsüla aser o meyipa reprangshitsüla.

Kodang lokti nung lennirtemi pei kija mulongba agi loktiji anir aotsü merangdir, lenmang aisu nung tetsükdaktsü ajurutsü; ken o bulutsü, mepetmesu aser telemsa adoktsü. Anungji lennir ajaki nubur madak lennitsü nuburtemi shimtet ta angateta; nubur akümtsüba; nubur züngshia loktiji anitsü kanga tongtipang lir. Tanu asen yimden, arogo, mungdang aser loktiliba ajak ya nisung ka/kar kisungi aniba (Autocratic/Dictatorship) yayim nung masü, saka nubur ajaki mulungba (Democracy) yayim nung anir. Anungji ken o telemtetba ajak nisung ka/kar kija mulongba agi masü, mesura nisung ishikati mulungba (Syndicate) agi masü, saka nubur nungi shisatsü agia telemtetba ajak agitsüla. Ano kangasa tongtipang kaji....Yimden, arogo, mungdang aser lokti ka anitsü atema lennir, tokolak aser komiti balala nung tenzüker shimdang; tip külen dang masü; saka kinuk ajaklen repranga shimtsüla. Lokti inyakyim nung nuburtemi temulung masü ola adok-aka; nubur ola mangai; tashiyim agi anir aotsü merangra itemji lennir tajung masü. Lennir shirnoki nubur ola angaa nubur taginuba angateta lokti anir parnok dangji lennir tajung ta ajar. Osangkaket nung yimden, arogo, mungdang aser lokti ajungtsü asoshi nuburtemi tebilemba lemsatapa züluba ya; tezülur kija tebilemba amai pongpa-pongpa-a magitsüla; saka nubur aika ola ta ret-ret agitsüla. Anungji lennir ajaki loktiji arok meyong ta angateta; nubur ola anga-a; nubur taginuba metettsü meranga kanga shisa kaa anitsüla.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Kyrgyzstan tepuokdak pastor ka tekolok yirutsü

**Bishkek, Mongputeni/Oct. 22 (Agencies):** Kyrgyzstan nung tepuokdak reshikangshia amshiba pastor ka tekolok meshidaki akum ta UN special rapporteurs ajanga ashir, ta Forum 18 ajanga ash.

Prison Chief Major Azat Kudaybergenov-i September 22 nü shiti ka nung arishi küm 65 tain True and Free Reform Adventist pastor, Rev. Pavel Shreider kinunger dang doctor temi pa aiben tendangogo aser "traumatic brain injury" ajanga "cognitive impairment" akum ta putet, ta shia liasü.

Tsükhitep adokdaksü ta tiaziü nung tai tonglokja küm asem tepuokdak ayutsü yoksang Pastor Shreider ya Prison No. 31-i belener ao, koba Kyrgyzstan yimtiba Bishkek nung medical unit ka lir. Par jala Vera Shreider-i Prison No. 21 ketdangsürtem dang tebu anepalutsü September 12 nü mepishia liasü.

"Official medical examination paper nungi ajitetba agi, pa dak encephalopathy putetogi, koba tekolok raksaba alitsü aser ibaji ajanga pa temang nunga kongshiogo," ta kinungeri ash.

"September 9 nü courtroom nung appeal hearing mapang pa kanga tashi mait aliba onoki nguogo aser tepuokdak ketdangsürtem dang pa temang anepalutsü atema medical unit bushia anir aotsü khanga tezüluba agütsüogo. Parnoki hopta ana dak tema lir ang pa anir ao," ta lar jalai ash.

National Security

Committee (NSC) secret police ajanga 2024 küm November ita Bishkek nung pastor ki aser arogo züngsem ter indang ki meita bushi aser apu. NSC secret police temi parnok puer asüngdangyaba mapang Pastor Shreider aser arogo züngsem asem reshikangshia amshi, ta Forum 18 ajanga ash, saka police temi magizük.

"Police pongui küdak tekolak, teko nung atsüng aser tesülen nungi kü teperem nung metsü. Ni mapa tamajung inyak ta nangzükdaktsütsü mechi police temi küdak iron pipe agi azük," ta Shreider-i November 2024 nung National Center for the Prevention of Torture dangi zülua liasü.

NSC secret police officers temi stun gun ka amshia arogo züngsem Igor Tsoi nem Pastor Shreider anema kuli züludaktsü. Stun gun ajanga Tsoi temang nung yiru saka pai parnoki akhangba sülen anidaktsü memulung, ta Forum 18 ajanga ash.

Nazila Ghanea, special rapporteur on freedom of religion or belief densema UN Special Rapporteurs pongui July 23 nü iba linük yimsüsür dang True and Free Reform Adventist Church züngsemtem apuba aser reshikangshia amshiba aser iba sülen Pastor Shreider merenshiba indang zülua liasü.

"Schreider aser arogo nung züngsem tepurtem pua ayuba mapang reshikangshia amshiba osang lir," ta special rapporteurs ajanga shia liasü.

"Schreider, Yuri Pauls, Igor

Tsoi, Peter Petkau densema telok nungi tebur tenet dak tekolak aser temang nung azükba iba telok nung tetsür aser tebur temi tenük kuli nguogo. Schreider aser Tsoi tebang cellophone bags agi nembangja tasers amshiba osang lir."

Special Rapporteurs-i yimsüsür dang parnoki True and Free Adventists anema inyakba aser Pastor Shreider health indang osang agütsütsü ash. Parnokisa pa reshikangshia amshiba, court ajanga arogo nokdangba ya international human rights den apet asü masü, aser arogo züngsem pezü reshikangshia amshi ta tai tonglokja aliba bushisüngdangtsü kechi mera tem agia lir ta asüngdanga liasü.

Kyrgyzstan yimsüsür temi September 20 nü Russia nunger oshi nung telangzüba tatsüka agütsü, ta U.N. Special Procedures communication website ajanga ash.

Arogo züngsem temi December 2024 nung United Nations dangi ki meita aoba, apuba aser reshikangshia amshiba indang zülua liasü.

Pastor Shreider aser arogo züngsemtem reshikangshia amshir shinga memerenshi. Reshikangshia amshi ta jembiba kuli magütsüteter, ta National Center for the Prevention of Torture ajanga shia liasü.

Kyrgyzstan indang Supreme Court-i True and Free Reform Adventist Church ya August 4 nü shibangtsü, anungji iba tekülem kidang tamangertem mesentepteti lir.

# Indonesia nung tamangba yimsü mechi bensaa amshiba tali akumer

**Surabaya, Mongputeni/Oct. 22 (Agencies):** Indonesia nung regional Religious Affairs Office ajanga mapa atema advertisement ka adoktsüba nung Muslim masürtem bensaa amshiba nung tai apuba sülen yanglushi ta osang tem ajanga ashir.

North Kalimantan Province nung aliba Tarakan Regency Ministry of Religious Affairs Office ajanga October 10 nü agütsüba ad nungya 'custodial aser office security' mapa atema applicants ya Muslim nunger aser Quran züngteter asütsüla ta shia liasü, koba Indonesian Christian Student Movement (Gerakan Mahasiswa Kristen Indonesia, GMKI) indang Tarakan branch-ibo ibai bensaa amshiba sorkar sentong lir ta ashir.

Tamangba yimsü dak sendaktepa maliba mapa atema tamangba yimsü nung qualifications kechi atema nüngdaker, ta Tarakan Branch of the Indonesian Christian Student Movement (GMKI), Michael Jama-i ash.

"Office security agütsütsü mesüra office müreksü atema komasür tamangba yimsü tejangja ka atema qualifications

nüngdaker?" ta Michael-i ash aser iba mapa nung tamangba yimsü masü ochishir aser temulung lemteter nüngdaker ta ash.

Iba mapa atema nübu shimtsüba ozüng yagi Indonesian constitution indang Article 27, paragraph (1), aser Article 28D, paragraph (2) nung aibelener, kong tebensa makai mapa inyaktsü temeden agüja lir, ta Michael-i ash. Iba ad yagi Tarakan ajanga Indonesia indang pluralism lendongi yoker, ta pai ash.

"Tarakan City Ministry of Religious Affairs Office ya Muslim nunger kija atema masü, saka tamangba yimsü balala nungi Tarakan nung alir ajunga asoshi lir," ta ash.

Instagram amshir @kabarsejuk ajanga iba ad ya sorkari kumtetba institution nung tamangba yimsü bensaa amshiba sayur ta ash. "Iba inyakyim ya 1945 Constitution and ILO [International Labor Organization] Convention No. 111 indang principle of equality den mapeter."

ILO Convention indang Article 1 nungya kin, sentsü, tetsür-tebur, tamangba yimsü, political opinion, national

extraction mesüra social origin nung amendaker melemsatsü shia lir.

"Indonesia nung arogo aika nung tamangba yimsü indang masüngdangi Muslim nunger aika mapa nung anioker. Item mapa inyaker ya tang tashi mapa shidak inyakdaktsür aser pei mulungba yimsü sülen anidaktsü melar," ta Instagram amshiri ash.

Indonesian Unity for All (Persatuan Indonesia untuk Semua, PIS) movement-ia tamangba yimsü nung ajemdaker sorkar mapa nung nübu shimba ya 'institutional discrimination' lir, aser ibaji maneni amshitsü melara lendong timtem tulu asütsü, ta ash.

"Iba yagi tanem-tanemi ozüng matsüngdang senso ajak sako amshiba tangatetba nung timtem agütsütsü. Ministry of Religious Affairs ya nisung ajunga kumzüka ayur asütsüla aser bureaucratic intolerance atema tatishitsü tamajung masütsüla. Security guards mesüra mürekmejuba mapa atema tamangba yimsü tsütsü reprangra majungtsü," ta PIS movement ajanga ash.

Nüburtemi aitsüba sülen

# ANOGO ABEN TSÜNGREM DEN

## Ejip nung metsü aser tesangwa (T.Ken 105:24-45)

Mosa aser Aaron mapang na Ejip nung ali asübo Farao chuba tekong merangba ajanga Ejip limai wara yokba nung na densemer lila. Yihuda nungeri Ejip toktsüdang naia kechi shir lila? Ken züluri ya zülü, "parnok aenshia aodang Ejip pelaa liasü, kechiyong parnok madak tetsübu agi tonga liasü" (t.38). Kodang Tsüngremer nisung alima nungi piladir, kodang asen Kibuba tanaben arudir, alimai pelatsü.

Ejipji alima noksa lir. Tsüngremer (Israel) asoshi, ibai alar lima aser anisüngzüük maka mapa inyakdak lir. Ibai tapung lima. Saka Kanan limaji lenten, tenem aliba lima, tsünglu aser süngjang teperi aliba lima, mamatzü aser ninang mochitzü ayimdak lima. Kodang na kümzüka lidir, tanelaren Tsüngremi na Ejip nungi anitettsü. Pai na Kanan nung yutsütsü aser ashitsü, "item temoatsütem ajak agiang."

Kechiba Israeli Ejip toktsüdang Ejip pelaa liasü? Tejangja kuli kaji- Ejip nunger tsübua liasü. Israeli chichiba Tsüngrem külema liasü, aser parnok Tsüngremi wara ajanga Pa ain sayu. Israel nungerji Ejip asoshi minprongtsü ka liasü- zübu nung metsü ama, tajung jungkai adoktsüba tesangwa ama. Ejip nung kuli asütsü Tsüngremi Israel amshi,saka Ejipi magizük.

Khristantemji metsü aser tesangwa lir. Ken ken asenoki nisungtem maginer: ken asen libaliro ajanga taiji tutettsür. Asenoki item anogotemji ajangtsü. Ibaji tanüa asütsü akok. Yisu Khrista tanü arutsü akok aser Pa pur sentsüwangshi kidangi anir aotsü akok. Joko metsü mali. Tesangwa mali. Saka kechi? Obendangba. Asen Kibuba aru ataba mapang asenok teinyaktsü mapa lir ta asenoki bilemtedi.

Arogo teinyaktsü mapa kaji alima mitsü aser alima tesangwa ama alitsübaji lir. Ken ken nai ibaji memeteti tangar yirutsür. Ken ken Khrista indang tangar dang ashitsü mapang tajung angur. Arogo ne mapa nung metsü aser tesangwa ama alitsü nai bilemtsü akok asü? Kar asoshi tanü ne taküm balaka alitsü Tsüngrem dang asüngdangang.

Tarakan Regency Department of Religious Affairs ajanga kasa anogo nikongdang 1:00 ako nung Islamist requirements ya indok.

Tarakan Ministry of Religious Affairs Office nung ketdangsür kati iba ad ya küm ana amshia arur ta ash. Yangji aliba Hajj dormitory ka nung post asüba ajanga bensaa amshiba ojang ya inoktsü, ta pai ash aser par office ajanga taoba mapang mereprangshi, kechiaser Indonesian Minister of Religious Affairs-i semdangtsü aliba atema parnok renemshiba mapang lir ta ash.

Constitution ajanga tamangba yimsü temeden agüja liaka telok kar nem mapa atema maongka agütsüba ya 'state favoritism' lir, ta Setara Institute for Democracy and Peace indang deputy chairman Bonar Tigor Naipospo-i ash.

Indonesia ya Islam nung ajemdaker kumtetba masü, ta pai ash aser sorkari Sawahan village, Buduran Sub-district, Sidoarjo Regency, East Java Province nung aliba Al-Khoziny Islamic Traditional Boarding School yanglushitsü sentong aliba tatishitsü bener aru, koba taoba ita chirepa nisung aika

takum sama.

School nung September 29 nü management ajanga storey pezü buba yanglutsü merangdang tebur kaketshir indang dormitories chirep, ta National Disaster Management Agency (Badan Nasional Penanggulangan Bencana) indang website nung shia lir.

"Ajungbena iba lendong atalokdang kaketshir aser mapa inyaker ter dak tema kisüba oset tsüka asü," ta ash.

Tang tashi iba lendong nung asü ajunga mejangjateti lir, saka ki yangluba nung aibelenba ajanga nisung 67 asü, ta ashir. Item rongnung police temi nisung 58 jangjatetogo. Iba den ano school ya building permit mali.

Indonesian Minister of Public Works, Dody Hanggodo-i ashiba agi, linük nung Islamic traditional boarding school 42,000 dak tema aliba nungi 51 dang nüngdakba licenses meshia lir.

License maliba Muslim nunger ki o jen yangluba nung sorkari senotsü teyari agütsür saka Khristanpuri building permits atema applications meshiba senzüka yutsür, ta social media amshirtemi ashir.

**AO OSHI ANGAZÜKDAK:****TANÜ ANGAZÜKTSÜBA OJANG****Tokuro**

(adj) magütsünüba, teka mesala (stingy)

\* Alima nung tokuro nisungji tia maka.

**Tokurojang**

(n) kanga tokuro, kenyongi tangar nem kecha magütsüner (miser)

\* Tokurojang nisungi aika den putepa meliteter.



Tir Yimyim

**OLONG PAITEP # 7307**

|    |   |    |   |  |    |  |  |   |  |    |
|----|---|----|---|--|----|--|--|---|--|----|
|    | 1 |    |   |  | 2  |  |  | 3 |  | 4  |
| 5  |   |    |   |  |    |  |  | 6 |  |    |
| 7  |   |    | 8 |  |    |  |  |   |  |    |
|    |   |    |   |  |    |  |  |   |  |    |
|    |   |    |   |  |    |  |  | 9 |  |    |
|    |   | 10 |   |  |    |  |  |   |  |    |
| 11 |   |    |   |  |    |  |  |   |  | 12 |
|    |   |    |   |  | 13 |  |  |   |  |    |
|    |   |    |   |  | 14 |  |  |   |  |    |
| 15 |   |    |   |  |    |  |  |   |  |    |
|    |   |    |   |  |    |  |  |   |  |    |

**TIPLIN**

- Balaka
- Aika shirangba
- Tar tatsü
- Nenü'er jabaso
- Sen latettsüba
- Tangar kübok alir
- Lon nung inokba
- Tzü ayimdak
- Ajok

**LANGTSÜNGLEN**

- Hai sür inyak
- Aor tenüng ka
- Ali telungi talangka lur
- Tebang kenyongi mazüoker
- Ken atema anenzükertem
- Toktepa noktak
- Sen
- Benjong agi
- Telung nung rizünga ayu
- Tebang nung enok

**OLONG PAITEP # 7306 TELANGZÜBA****TIPLIN :**

- Aben, 4. Artsü, 7. Lisem, 8. Liwa,
- Sarasadem, 12. Aket, 14. Mangu,
- Anünü, 16. Ango.

**LANGTSÜNGLEN :**

- Aruli, 3. Balala, 5. Suwar,
- Belem, 9. Sükak, 10. Aonung,
- Dokan, 13. Tinu.

**NAI-A YA METETTER**

Xbox-i Ninja Gaiden 4 sayaba nüngtem nung Miami, US nung otsüsütsü aketba mapa ka inyakogo. Xbox-i helicopter ajanga anüng tom nung 215-square-foot screen ka sangzüa ayu aser idakji Xbox Team Ninja community manager Emmanuel "Master" Rodriguez aser recording artist Swae Lee nati game asayaba sayua liasü. Iba sentong ya aerial media company HELI-D ajanga ayongzüker aser advanced broadcasting technology amshia Rodriguez aser Lee nati helicopter tanabuba nung mener game asaya.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Miss Shirui Lily Esme Shaiza-i Global Pageant nung shilem agir****Imphal, October 22, 2025**

(Agencies): Manipur nung Miss Shirui Lily 2025 Esme Singh Shaiza-i India tenüng nung Miss Friendship International Pageant (MFIP) 2025 nung shilem agir.

Esme ya Ukhrul district nungi lir aser China nung MFIP 2025 nung tang shilem tagidak lir. Iba tetoktepba ya October 15 nungi November 5 tashi Chengdu dena Chin yimtiba balala nung ayonga agitsü.

Iba tetoktepba nung linük 60 jungnüa nungi tetoktepertem lir aser parnok ya linüktem tsüngda cultural exchange, goodwill, aser friendship nükjidong yur shilem agir.



Tetoktepba nung Esme-i traditional Tangkhul Naga attire ka subor shilem agia liasü. Esme ya fashion model aser Political Science nung postgraduate student ka lir aser international platform nung lai shilem tajung agiogo.

October 8, 2025 nü Esme-i Bir Tikendrajit International Airport, Imphal nungi apusoa ao. La apusoa maodang Manipur Department of Tourism aser la meimer ajak dang pelaba metetdaksü.

Miss Shirui Lily 2025 ya taküm May ita Vangayan Shirui village nung agia liasü aser iba tetoktepba nung Hunphun village nungi Esme-i takok korang angu.

**CM Sarma-i Baksa semdanga yirua alir nem cheques agütsü****Guwahati, October 22, 2025**

(Agencies): Baksa nung tawa tepuokdak mepetmesü adoka raradang yirurtem nem Assam CM Himanta Biswa Sarma-i senotsü teyari agütsüogo.

October 15 nü Baksa District Jail kima nung mepetmesü adoka raratepdang nisung 21 yirua liasü. Teyirurtem rongnung police aser journalists densema liasü.

Zubeen Garg asüba ken o nung tai tonglokja alir nisung pungu Baksa Jail-i anir arudang nübortemi police den

mepetmesü adoka raratep.

Chief Minister Sarma-i Mongulbarnü iba tatalokba nung yirua alir Dipak Medhi aser Bidyut Kalita na nem Rs 2 lakh cheque agütsü.

October 15 nü iba tatalokba nung police 10, journalist tem aser civilian aika yiru.

Parnok rongnung kanga mejungi yirur ana Gauhati Medical College and Hospital (GMCH)-i anir ao aser injang agi yirurtem AIIMS, Guwahati-i anir oa anepalu.

Baksa District Jail-i anir arurtemji Shyamkanu Mahanta, Siddharth Sharma, Sandeepan Garg, Nandeshwar Bora, aser Paresh Baishya nunger lir.

Parnok ya police convoy ka nung anir aru saka tepuokdak kishizüng atongdang nisung telok kati tejashi nung garitem dak lung aser osettem mereploktsü. Idangji tetsür police ketdangsür ka densema nisung aika yoru.

Par punguprong Baksa District Jail nung high-security unit nung yua lir.

**Assam-Meghalaya arrtsülen yimjung tenangzüktep agiogo****Guwahati, October 22, 2025**

(Agencies): Meghalaya kübok Pnar yimdaklirtem aser Assam kübok Tahpat yimdaklirtem tsüngda peace agreement ka sign sütepogo aser iba ajanga aluyimertemi tetsükdaksü melii tsük arohtsü.

October 20 nü Assam Border Outpost, Khanduli nung West Jaiñtia Hills aser West Karbi Anglong district tem nungi ketdangsürtemi yimtsüng

anaprong nungi nübotem den yaritepa senden ka amen.

October 8 nü yimdaklirtem tsüngda mepetmesü adoka raradang Tahpat nunger Oriwel Timung asü.

Telok anaprongi yimjung nung alitsü mulunga agizükogo. Tang bushisüngdang asüba nung parnoki amalitepa yariteptsü aser alu arohba mapang timtem magütsütsü nnangzükogo ta ketdangsürtemi ashi.

Iba senden nung West Jaiñtia Hills Border Magistrate GH Passah, West Karbi Anglong Deputy Commissioner SP Sarma, Superintendent of Police R Barua aser yimtsüng anaprong nungi headmen aser tanishirtem aden.

Iba tenangzüktep ajanga Assam aser Meghalaya nung arrtsülen alirtem tsüngda temulung lemteped adoktsü ta ketdangsürtemisa ashi.

**IFCSAP-i Home Minister dang APFRA Act 1978 benoktsü akhanger****Itanagar, October 22, 2025**

(Agencies): Indigenous Faith and Cultural Society of Arunachal Pradesh (IFCSAP) teshimtet telok kati Home Minister Mama Natung den ajurutepa Arunachal Pradesh Freedom of Religion Act, 1978 (APFRA) mapa tenzüksü ayongzükogo.

Arunachal Pradesh sorkar

nung Mama Natung-i Department of Indigenous Affairs aser Water Supply repsema bena lir.

IFCSAP President Emi Rumi aser General Secretary Maya Murtem anti anir Youth Wing President Radh Taba aser Secretary Rikar Dini nungeri Natung den ajurutep.

Arunachal Pradesh nung

lisopur tamangba yimsü, sobaliba aser maitsü kümzüka ayutsü atema APFRA mapa tenzüksüla ta parnoki memorandum ka agütsüogo.

Arunachal nung lisopur senmang kümzüka ayutsü kanga nüngdak kümogo kechiyong tanga tashitem ajanga amokbanger ta IFCSAP-i ashi.

APEC summit tonga aruba mapang N Korea-i ballistic missile aika tendangogo



**Seoul, Mongputeni/October 22 (Agencies):** North Korea-i tan ita tang mezüngbuba short-range ballistic missile tem aika tendangogo, ta South Korea indang military-i metetdaksü. Asia-Pacific Economic Cooperation (APEC) summit ayongzüka amentsü atema Seoul renemba mapang North-i ano missile aika tendangtsü akok ta mongintemi tekümdangtsü metetdaksüogo. China Tir Xi Jinping, United States Tir Donald Trump aser tanga lenirtem South Korea kübok Gyeongju yimti nung APEC summit atema ajuruteptsü hopta ka lia Bodhbarnü anepdang missile tem ya tendangogo. South Korea military-i ashiba agi, parnoki short-range ballistic missile asütsü ta bilemba missile tem aika anütoklen tzüyim koba dang Sea of Japan ta-a ajar, iba tzüyim leni missile tem khaketa yokba jangjaogo, ta official

South Korean Yonhap news agency-i metetdaksü. Iba sülen mapang tatsüka lir South Korea indang military-i ashiba agi, missile tem ya km 350 shi yima ao aser taoba mapang tzüyim nung tsük asütsü ta bilemba ama masü saka ali nung tsük asütsü ta bilemer. North Korea-i tesüsa ita pongu tejakdang May 8 aser May 22 nü short-range ballistic aser cruise missile tem anütok tzüyim leni khaketa yokogo, aser iba tetezü South Korea nung Tir tasenba Lee Jae Myung-i mapa agizükba sülen tang mezüngbuba North-i missile tem tendangogo. Pai Tir mapa ya June ita agizüka liasü, ta Yonhap-isa metetdaksü. Mongintemi ashiba agi, North Korea-i parnoka nuclear-armed state ka ta agizükdaksütsü atema APEC summit magi tsüngda, mesüra tagidak nung missile tem tendangtsü akok ta

tekümdangtsü metetdaksüogo. North Korea lenir Kim Jong Un-i iba ita tetenzüklen Pyongyang nung military parade ka agiba mapang long-range Hwasong-20 intercontinental ballistic missile tasenba sayuogo, aser iba ya linük indang missile tashi taittiba ta shiogo. Kasa mapang nung Pyongyang-i, prangbong injang balala yanglutsü atema alima kintemi tenokdangba agütsüba magizüker aser ashiba agi, US aser South Korea ta tsükchirtem nungi North Korea kümzüka ayutsü atema iba ya kanga tongtibang lir. Trump-i taoba mapang North Korea lenir den ya ajurutepogo aser tawa ano Kim den ajuruteptsü imlaba lemsatepogo. Kim-ia Trump den sensaksemtsü atema mulunga aliba lemsatepogo, saka North Korea-i nuclear arsenal tem toktsütsü asoshi kodanga memulungtsü, ta shiogo.

Israel, Hamas na ano tasü mang melentep

**Cairo, Mongputeni/October 22 (Agencies):** Israel aser Hamas na maneni tepuokertem tasü mang melentepogo, ajisüaka Palestine nunger telok yagi Israel aitsüogo aser ashiba agi, Gaza ceasefire atema nangzüktepba nung Egypt den Rafah border crossing lapoktsütsü atema nangzükteper aliba Israel-i minyaker. Israel nunger sepai ka aser civilian ka indang tasü mang Mongolbar aonung agütsüogo aser Bodhbbar anepdang iba tasü mang ana ya Aryeh Zalmanovich, 85, aser army Master Sergeant Tamir Adar, 38 ta jangjaogo. International Committee of the Red Cross (ICRC)-i tasü mang ya Gaza nung Hamas indang armed wing Qassam Brigades ket nungi agizüka liasü. Israel military-i ashiba agi, Zalmanovich ya Gaza nung 2023 küm November 17 nü asü aser Adar ya 2023 küm October 7 nü southern Israel

nung khatepba mapang asü aser pa tasü mang ya Gaza-i bener oa liasü. Tasü mang ana densema Hamas-i Israel den ceasefire atema nangzüktepba nung shilem ka ama Israel nunger tasü mang 15 meyipa agütsüogo. Ano tasü mang 13 shi magütsüi lir, saka Hamas puri ashiba agi, Gaza kanga mejungi raksar aliba aser Israel military-i Gaza kübok tesem kar maneni atsünger aliba ajanga tasü mangtem monguteti lir. Hamas purisa ceasefire tenzüka sülen anogo ka nung Israel nunger 20 chiokogo. Mongolbarnü Israel-i sota aliba mapang asüba Palestine nunger tasü mang 15 Gaza-i yokogo, kong parnok maitsü jangjatsü atema Nasser Medical Complex-i bener oa liasü, ta medical source kati metetdaksü. Ceasefire atema nangzüktepba kübok Israel-i Palestine nunger 2000 shi chioktsü mulunga agizükogo

aser ano Palestine nunger tasü mang 360 agütsütsü nangzükogo. Taoba hopta Israel-i Palestine nunger tasü mang 45 meyipa agütsüba forensics team kati agizükogo. Tasü mang karbo alener liasü aser züka merenshiba temaitsü aliba ngutetogo, ta ketdangsürtemi ashi. Kasa mapang nung Mongolbarnü Qatar nung Turkey nunger ketdangsürtem den sensaksem nung shilem agiba Hamas nunger ketdangsürtemi ashiba agi, Israel-i ceasefire anema inyaksangshiaka parnok iba tenangzüktepba ya benoka inyaksangshitsü atema maneni bendanga agütsür lir. Yirur alir aser shirangertem senzüsenpongtsü atema aser humanitarian teyaritem Gaza-i aitsü asoshi Israel-i Rafah crossing melapoktsüi ceasefire nung nangzüktepba benoka inyaktsü menomeyanger, ta Hamas ketdangsürtemi ashi.

Tangbo Trump-Putin ajuruteptsü sentong mali

**Washington, Mongputeni/Oct. 22 (Agencies):** Ukraine nung ceasefire indang jembitsü atema Russia Tir Vladimir Putin aser US Tir Donald Trump yakta ajuruteptsü ta imlaa aliba linük ana nungi ketdangsür temi iba teimla samatsüogo. Tir Putin-i Russia tir den Hungary nung hopta ana tsüngta ajuruteptsü ta sangdongba sülen Mongulbarnü iba sangdong ka arur. "Tir Trump-i Tir Putin den tang ajuruteptsübo sentong mali," ta White House ketdangsür kati osangbener dang ashi. Moscow-ia kasaji ashi aser lenir ana tsüngta senden amentsü asoshi renemkonemba nung mapang agitsü ta shia liasü. Hopta tatemlen Russia-i US dangi 'private communique' ka agütsüba nung Ukraine indang Donbas region ajunga par küboki aittsü khanga liasü, ta ketdangsür kati tenüng miimshia ashi. Iba takhangba ya Trump-i aginüba ama masü, shibai

'battle lines' ya tang alidak soittsü atema Deobarnü shia liasü. Iba sülen Hombarnü Russian Foreign Minister Sergey Lavrov aser US Secretary of State, Marco Rubio na phone ajanga jembia liasü. Ajisüaka senden mamentsü, ta Mongulbarnü White House-i jangjatsü. "Secretary Rubio aser Minister Lavrov phone ajanga junga jembio. Anungji Secretary aser Foreign Minister ajurutepa senden amentsü menügdaker," ta White House ketdangsür kati sangdong ka nung ashi. Ita ana tejakdang Alaska nung Trump aser Putin senden amendang Moscow indang tangatetba kasaji memelenshi tang tashi lir, ta Lavrov-i ashi. Moscow-i rara tembangtsü asoshi akhangba nung Ukraine ya "neutral" nung alitsüla aser par mitkar tashi raksatsüla ta ashir. Parnoki Ukraine indang litsü-lika rakzüka aliba par ket nung yuner.

Office of the

LONGMISA SENSO MUNG DANG

P.O Mokokchung - 798601 B.P.O Longmisa

Mokokchung : Nagaland

TENUNGSANG AGUTSUR

Longmisa Senso Mung dang ajanga tenünsanga Smt. Kikumsungla Jamir NCS Joint Secretary, Planning & Transformation Department Nagaland Kohima jenjang ajangzük tetba asoshi konang tetushi agütsür.

Asen teyanglur Tsüngremi nü taküm, kibong aser wadang ajak nung maneni moajangma.

Sd/- Pangersosang President, LSM

Sd/- I Senkanungba Ao G. Secretary, LSM

SANGDONGER

14th Buba Marsosang Football Trophy December, 2025 tanabuba hopta nungi LTGHS Chuchuyimlang ground nung asayatsü. Anungji tejangrartemi agüja aliba number nung tongteprateptsü akok.

Contact No. + 91 9612454540 ; +91 76280 83503

Sd/- (NUNGSANGTEMSU) Convenor

Organising Committee, MFT 2025

बैंक ऑफ बड़ौदा

Bank of Baroda

HIGH SCHOOL JUNCTION BRANCH

High School Junction, Vizo Commercial Centre, Kohima, Nagaland- 797001

Email: vjhigh@bankofbaroda.com

GARI TAYOKTSÜ LIR

MRS. Z HOKALI AYE nem Bank of Baroda, High School Junction Branch-i senotsü teyari agüja aliba vehicle/Equipment aser sentsüh maotetba ajanga gari sota ayuba tayoktsü lir.

Iba gari alitsü jangrartemi tsüngtong arua gari asadangtsü aser gari indang osang tejangja agitsü atema ken o dak sendaka aliba ketdangsür den tongteprateptettsü. Offer shiti den gari atema Earnest Money Deposit (EMD) ama sen **Rs. 21,500/- (Rupees Twenty One Thousand Five Hundred only)** refundable/adjustable Banker's Cheque/DD benoktsüla. Gari alitsü tebilemba alirtemi gari atema offer letter sealed envelope ka nung "Quotation for purchase of vehicle No. **NL01CA4977**" aser teküboklen shisema aliba gari tenüng zülur ketdangsür nem 24.11.2025 nü nikongtsütsü 4:00 ako tashi nungbo benoktsüla. Sealed quotations ya 24.11.2025 nü nikongtsütsü 5:00 ako nung **Bank of Baroda, High School Junction Branch** nung gari alitsü tebilemba aliba nisungtem matsüng dang lapoktsü.

Bid takok ngua asüri quotation lapokba anogo nungi tenzüker anogo 05 (pongu) tsüngda sen agütsütsüla mesüra Branch tekolakbai atakzüksüba mapang tashi nung benoktsüla, ajita mesura pai deposit süa aliba EMD meyipa mangutsü aser garia yokadoktsü. Vehicle/Equipment ya Bank-i latetja aliba jenjang dang nungi tekübokba nung mayoktsü.

Ken o dak sendakba nung tashi agüja aliba ketdangsür ket nung kuli kecha magütsür offer tem agizüksü mesüra magizüksü atema tashi lir. Gari ya mapang inyakba anogotem nung Bank inyaksangshia aliba mapang asadangtettsü.

| Sl.No. | Vehicle Make and Description                                                                                                          | Reserve Price  |
|--------|---------------------------------------------------------------------------------------------------------------------------------------|----------------|
| 1      | <b>SANTRO 1.1MT SPORTZ (NL01CA4977)</b><br>Engine No.: G4HGNM124493<br>Chassis No.: MALAF51CLNM182447<br>Year of Manufacture: 03/2022 | Rs. 2,15,000/- |

Date: 23.10.2025  
Place: Kohima

Branch Head  
Bank of Baroda, High School Junction Branch

## 27 Buba MDFA Trophy mezüngbuba Semi Final Osang



Super Seniors FC aser Doyang Strikers MKG tsüngda mezüngbuba Semi Final asayaba mapang tangokba noksa nungji angur.

**Mokokchung, Mongputeni/October 22 (TYO):** Tanü Imkongmeren Sports Complex Mokokchung nung 27Buba MDFA Trophy mezüngbuba Semi Final asayaogo.

Super Seniors FC aser

Doyang Strikers MKG tsüngda mezüngbuba Semi Final asaya nung Match Patron Okusa Toyota Managing Director Wb. Y. Vikheho Swu liasü.

Iba asaya tenzüker kelen minute 34buba nung Doyang

Strikers MKG nungi J.no-10 Hiram-i goal 1 yok aser ano par telok nungisa minute 38buba nung J.no 9 Yhoto Lohe goal-1 yokteta par telok takoklen sür anisüngzüka mapang agi.

Telok ana tanaben ground-i aita asayaba mapang nung Doyang Strikers MKG nungisa minute 57buba nung J.no-9 Yhoto Lohe-i goal 1 yok aser ano par telok nungisa J.no 15 Ganchui-ia minute 58buba nung goal 1 yokteta Doyang Strikers MKG- i goal 4-0 agi Super Seniors FC kokteta taküm MDFA Trophy Final asayatsü jenjang tongtetogo.

### 27 MDFA Trophy

23-10-2025 Semi Final

Fixtures

2nd Semi Final, 1:00 noon : Telongjem FC Vs Chargers FC

## T20WC atema renmtsü asoshi Lanka Premier League thinener

**Mongputeni/October 22, 2025 (Agencies):** ICC Men's T20 World Cup 2026 atema renemshitsü asoshi Sri Lanka Cricket (SLC)-i 2025 küm atema Lanka Premier League (LPL) officially thinentsüogo. Iba asayamung ya taruba küm February aser March ita India den longjemer ayongzüka asayatsü.

Iba asayamung ya taküm November tatemlen nungi tenzüka December tatem tashi asayatsü sentong yanglur liasü, saka SLC nem World Cup atema linük cricket infrastructure tem renemshitsü asoshi rangloker inyaksü atema lenmang sadema lapoktsütsü atema iba asayamung ya thinenogo.

SLC-i sangdong ka ajanga ashiba agi, ICC Men's T20 World Cup 2026 atema jelia kanga junga renemshitsü asoshi nüngdakba kanga junga asadanger iba telemtetba ya agiogo.

"Lanka Premier League (LPL) 2025 ya lateta aliba ama taküm masayatetsü ta Sri

Lanka Cricket (SLC)-i metetdaksür. ICC Men's T20 World Cup 2026 atema jelia kanga junga renemshitsü nüngdakba junga asadanger iba telemtetba ya agiogo, koba Sri Lanka aser India na senteper 2026 küm February aser March ita ayongzüka asayatsü lir," ta board-i ashi.

Team 20 asayatsü aliba asayamung atema international tetoktepba tongtibang ka tenüngdakba ajak peritsütsü asoshi host venues ajak kanga junga alitsüla, ta ICC guidelines nung shia liasü. Iba dak ajemdaker SLC-i, taküm domestic T20 league asayatsü melen rongsen aser mapa ajak venue tem renemshiba nung entoktsü telemtetba agiogo.

Board-i tongtibang venue tem ajak nung infrastructure jenjang ajungkettsü atema sentong ka yangluogo, koba terpranger anisüngzü, asayar aser media facilities aser broadcasting standards dak rangloker lir.

"Iba telemtetba ajanga linük

nung iba asayamung takok ngua asayatsü atema ground infrastructure tem jenjang ajungkettsü asoshi mapang peria agütsütsü ta SLC-i amanger," ta kasa sangdong ajanga metetdaksü.

Infrastructure jenjang ajungketba nung spectator stands aser public facility tem yanglyushiba, dressing room aser asayartem training area tem Modernize asüba, international broadcast facilities yanglushiba, global media coverage atema media center infrastructure jenjang ajungketshiba aser asayaba teseptem yanglushiba densema lir.

Colombo nung R. Premadasa International Cricket Stadium (RPICS) densema tongtibang international venue asem nung mapa tenzüko. ICC Women's Cricket World Cup 2025 nung asaya 11 ayongzüka asayaba ajanga RPICS nung inyakyim ya khen atema anena lir, saka WC tembangba sülen mapa tenzüksü.

## Punjab FC-i Spain nunger midfielder Dani Ramirez alizükogo

**Mongputeni/October 22, 2025 (Agencies):** Indian Super League (ISL) club Punjab FC-i Spain nunger attacking midfielder Dani Ramirez Fernandez alizüka team akangshiogo. Arishi küm 33 tain asayar den ya küm ka atema tenangzüktepba yangluogo.

Honibarnü Goa nung Super Cup 2025 metenzük tsüngda Punjab FC-i bendanger asayar alizükba nung Ramirez ya tanabuba asütsü. Parnoki Samir Zeljkovic alizüker liasü.

Super Cup 2025 nung Punjab FC Group C nung Bengaluru FC, Mohammedan Sporting, aser Gokulam Kerala nunger den asayatsü.

Ramirez ya tesüsa Turkey indang TFF First League nung Manisa FK nungi asayaogo. 2024-25 season nung pa Manisa nungi 34 ben asaya aser iba mapang pai goal tenet idaktsü aser assist pezü süja liasü.

Spain nunger asayar ya hometown club CD Leganes nungi asaya-a tenzüker aser iba sülen Real Madrid.-i ao. Pa

Real indang youth setup nung season pezü asaya aser iba mapang Real Madrid C nungi asaya liasü. 2014 küm pa Valencia CF B nung aden aser Spain nung lower division tem nung maneni asaya liasü.

Maneni pa Getafe CF aser Internacional de Madrid nungi asaya aser iba sülen Polish club Stomil Olsztyn SA-i ao. Pa LKS Lodz nungi season ana asaya aser iba sülen Lech Poznan-i ao, kong pai 2021-22 season nung Ekstraklasa title bena liasü. Ramirez ya ano Belgium nunga Zulte Waregem nungi mapang tatsüka asaya aser iba sülen Lodz-i meyipa ao.

Dani Ramirez-i pa iba Indian Super League club nung densemba atema kanga pelaba lemsatepogo. "Punjab FC nung adenba ya jenjang tasen ka temsü temsüa agiba ama bilemer. Linük balala nung league balala nung asayaba sülen team takok asoshi kü tajangshibatem lemsateptsü yongya atar," ta midfield nung asaya sang yagi ashi.

## Novak Djokovic Paris Masters masayatsü

**Mongputeni/October 22, 2025 (Agencies):** Novak Djokovic-i Mongolbarnü sangdong ka ajanga pa taruba Paris Masters nung masayatsü ta metetdaksüogo, ajisüaka taruba küm iba asayamung nung asayatsü imlar, ta shisem.

October ita Shanghai Masters semifinal nung world number 204 Valentin Vacherot makokba sülen Djokovic tang tashi nung official asaya ka danga asaya mali.

Iba asaya nung arishi küm 38 tain asayar ya asaya tepeyong kanga timtema asaya. Pa court tezülen saksüba den medical treatment aiben agitsüsa küma liasü.

"Temeim Paris, tia maka ni taküm iba asayamung nung shilem magitetsü," ta Grand Slam 24 koker aliba asayar yagi social media ajanga metetdaksü.

"Kümtem tsüngda iba asayamung nung takok aser tajangshiba tajung aika ajangshiogo, talisa iba asayamung tenetben akokba ya jangrademtsüka lir.

"Nenok den taruba küm ajuruteptsü imlar," ta Djokovic-i ashi.

Taoba hopta Djokovic, Saudi Arabia nung Six Kings

Slam nung America nunger asayar Taylor Fritz den tasembuba jenjang atema asayatsü liasü saka masayatetsüsa aküm.

Serbia nunger asayar ya taoba season-a Paris Masters nung masaya aser pa joko teshimtet asayamung kar nung dang asaya arudar. Djokovic-i otsüsütsüsa Grand Slam 24 koker lir aser tang 25buba akoktsü merangba mapang pa asayamung aika nungbo shilem magir, kechiyong tain akümer asünung asayamung ajak nungbo tashi ita masayateti arudar.

Kasa mapang nung world number 10 Holger Rune-a taküm Paris Masters nung masayatetsü. Pa Achilles tendon operation agiba ajanga iba asayamung nung masayatetsüsa kümogo, ta metetdaksü.

"Surgery kanga junga agiogo.. ni temang anepaluba indang maneni metetdakja alitsü. Ajisüaka tangbo anisüngzüka taneptsü bushitsü," ta Denmark nunger asayar yagi Mongolbarnü Instagram ajanga metetdaksü.

Taküm Paris Masters ya October 27 nungi November 2 nü tashi asayatsü.



Mokokchung District Volleyball Association-i ayongba tang tesaidak 18th Imchaba Master Memorial Nagaland Open Volleyball Trophy nung United Changki aser Yangs Brothers na Multi-Purpose Indoor Stadium nung asayadang tangokba noksa nung angur. Taküm iba asayamung marok rakteptsü asoshi telok 13-i shilem agidar, aser ibai 24th October, 2025 nü tembangtsü. Mokokchung, October 22, 2025.

## BILEMDANGANG

"Tangar nem memetetdaksüi inyakba mapa tajungji ajak dang tajungtiba asütsü."